

Dörflichechter 2004

E Gruebe isch hie und ou eini dört,
Überall hett's Löcher, das isch unerhört,
Wenn dür Biel tuesch fahre luure huffe Gfahre,
Bousteu hie und dört, das isch ganz eifach gschört,
Mir wünsche üs drum so gärn zrüg üsi Expo,
De würd ir Stadt es halbs Jahr keni Bousteue stoh !

Jo der Harald Schmidt isch überall bekannt,
Sini Leit Näit Schou luegt me i mängem Land,
Denn die grossi Schnurre isch sis Marggezeiche,
Doch jetz hett är gnue u loot sech nid erweiche
Und tuet verloh SAT1, mir mache do `ne Wett,
Wü si Chef e grösseri – sprich – e Züri-Schnurre hett !

D' Bieler Verchehrsplanig macht üs chlei Gedanke,
Chunnsch zum Bahnhof use, de muesch schier afo tanze,
D' Taxi stöh mou hie, u nächhär wieder do,
Weisch nie, wo die Taxi am nöchschte Tag tüe stoh,
Mir hätte drum jetz no e chlyne Vorschlag do:
Löt se doch ganz eifach grad zmitt's vor em Ygang stoh !

Jetz isch wieder Winter, und s' git viu Schirenne,
Doch wenn de das gsesch, de chönntsch schier afo penne,
Italiäner, Schwede, Schwobe und Östriicher,
Lache jetze über üsi Schwyzer Schlycher,
Es isch drum halt eso, si tüe im Ziel acho,
Wenn alli angere lengschens a der Bar tüe stoh !

Chäs isch doch Chäs, je lieber desto rääs,
Jetz föh si afo spinne dört im Wallis hinge,
Raclette söusch nume no usem Wallis übercho,
Mir Schwyzer si scho dumm, bringe nang no säuber um,
Bi üs wird drum dä Chäs ab sofort boykottiert,
Am Änd isch drum dä Cheib no vo de Schwobe importiert.

D' Bundesstadt heisst Bärn, die hei doch alli gärn ?
Wär dört regiert, isch sicher nid vo färn,
Doch git's e Huffe Sache, wo me drüber cha lache,
Und ou e Huffe Märli, wo üs truurig mache,
Sit däm der Merz u der Christoph im Bundesrat umebloche,
Heisst eis Märli: Micheline u die sächs aute Chnoche !

Im letschte Jahr hett ds Schwyzer Fernseh 50 Jahr dörfe fyre,
Drum hesch dörfe luege auti Filme u Serie,
Viu Nöis gsesch auerdings nie ufem Schwyzer Sänder,
Drum luege mir gäng d' Sänder vo de angere Länder,
Mir froge üs e chlei, was fyre die so lang ?
Wahrschynlech nid der Sänder, sondern 50 Jahr z' glych' Programm !

Im Fanti hett's brönn, i däm heisse Schuppe,
Jetz isch fertig luschtig mit dene blutte Puppe,
Fertig Cüpli schlürfe, bis der Morge chunnt,
Si gö der Sach uf d Spur u finge ou der Grund:
E technische Defekt sig's, mir chöi das fasch nid gloube,
Das FÜRli chunnt doch sicher vom `ne überhitzte Choube !
